

LAI: Magdalena Martullo-Blocher scu giast dalla pps regiun Alvra

«Mengia blers parlamentararis professionals»

G.N.S. An rotschas èn commembers e simpatistants dalla arteida populara svizra nias a Lai per assister agl referat dalla patrunga dalla «EMS Chemia». An en colp ò ella gudagnea la simpateia digls preschaints, betg angal perveia da sies votums, mabagn er graztga a sies humor e sies sa mussar natural.

La parteida populara svizra digl Grischun (pps) ò tscharnia Lai scu li per dar l'antschatta agl cumbat electoral per las elecziuns naziunalas 2015. Chegl è er sto igl giaveisch digl pi prominent candidat dalla pps, tgi sa metta a disposizun per eventual eir a Berna aint igl cunsegl naziunal, schi chegl è la viglia digl suveran grischun. Igl sies nom è nign oter tgi Magadlena Martullo-Blocher, siva da 12 onns la patrunga dalla pi gronda interpresa da noss cantun. Da sa preschentar a Lai, per l'emprema geda public scu candidata uffiziala dalla pps grischuna pigl cunsegl naziunal fetscha grond plascheir, ò detg la feglia digl anteriour cunsiglier federal Christoph Blocher. Siva da prest en onn vegia ella ena tgesa da vacanzas a Lai ed ansomma vegia ella fitg a cor chella regiun digl Grischun central. Tant scu pussebel passainta ella cun sia famiglia igl taimp liber a Lai, noua tgi tots gioldan la singularitad da chel li. «Savognin e Tinizong canoscha er bagn cun esser stada da mattatscha adegna puspe an Surses scu manadra digls curs da J&S (Jugend und Sport)», ò detg Magadlena Martullo-Blocher. Ansomma vegia la regiun Alvra/Surses scazis culturals e valours scu pacas otras regiuns, tgi valan la pagna da mantigneir, tgirar e betg disfar. L'agricultura, igl turissem ed er l'economia seian da gronda muntada per chella regiun e gist la valeta da chellas branschas seia da dar anavant, e chegl bod ainten mintga famiglia svizra. Er la folclora populara e genuina dovra la Svizra ed er da chella seia dad averir chito, ò accentuo Magadlena Martullo-Blocher.

Bung dad averir en tiradour an famiglia

Strousch tgi la famiglia vegia piglia parzial dimora a Lai vegia ella er s'infurmo schi exista ainten la regiun ena secziun dalla pps. Igl pi grond plascheir da chel interess ò sa tgapeschagia Werner Wyss, siva digl 2008, igl onn da fundaziun dalla pps regiun Alvra ed igl «cor» da chella secziun. El è er sa musso ventirevel tgi Magadlena Martullo-Blocher è neida cun plascheir a Lai per sa preschentar a vigl e gioven. Tot cuntaint era igl president activ alloura er, tgi igl interess pigl referat digl giast prominent



Magadlena Martullo-Blocher, la candidata dalla pps pigl cunsegl naziunal cun Werner Wyss, igl president dalla pps regiun Alvra.

ò attratg passa 120 persungas. La referenta ò detg tgi igl sies om fetscha da preschaint la patenta da tgatscha e chegl sen cunsegl da divers catscheders tgi seian stos dalla parteida chel de digl vintschigliung dalla nova tgesa da vacanzas. Cun en sureir ò la donna da Meilen detg tgi seia bagn er ainten la politica en avantatg dad averir en bung tiradour ainten tgesa. Scu adegna puspe durant l'antiera seira ò Magadlena Martullo-Blocher er retschet siva da chels plets, bler applaus digl grond public.

Mantigneir chegl tgi vagn

Ainten ena interpresa dovrigl novaziuns ed invenziuns, dantant tgi ainten la politica fess migler da rinforzar e sviluppar las atgnas fermezzas, anstagl da disfar tot, chegl tgi igl cunsegl federal ed igl parlamaint fetschan da preschaint. «Mantigneir chegl tgi vagn fess savens migler tgi sa vischinar adegna pi ferm all'Uniun europeica, scu chegl tgi ena gronda part digl parlamaint ed igl cunsegl federal less», ò detg Magadlena Martullo-Blocher. Igl spazi liber, la libertad, la neutralitad e l'indipendenza chegl totga tar la Svizra e tar la sia cultura, er schi dalla vart sanestra vegian chels aspects adegna pi paca muntada. Ena part digl cunsegl federal, pero cunzont igls sanesters ed er las parteidas da mez, promovon e sustignan ferm l'energeia solara e mulegns da vent e tralascian fitg la forza hidraulica, tgi seia er aint igl taimp dad oz ed igl futur da gronda valour. Gist pigl cantun Grischun seia la forza hidrau-

lica adegna stada da gronda impurtanza e chegl vigna er ad esser venvant uscheia.

Delegar ed averir confidanza

Magadlena Martullo-Blocher è digl meini tgi aint igl parlamaint federal mantgan persungas tgi fetschan betg angal politica. I dovra represchaintants tgi lavouran e magnan interpresas e betg angal teoretichers. Alla Svizra faschess angal bagn schi dess damanc politichers professionals e da chels tgi surpiglessan duple responsablidad a Berna. «Ainten la tgesa federala ed ainten igls departamaints cumondan oz prest igls funcziunaris (Beamte) e betg igls parlamentararis ed igl cunsegl federal», ò punctuo la referenta. La Svizra vegia ansomma mengia blers da chels uffizials ed er giurists tgi s'occupan cun leschas, scumonds e perscripziuns. Per neir per exaimpel tar ena lubientscha da biagier dovrigl ena birocrazeia, chegl tgi seia ple u manc tot taimp pers. Magadlena Martullo-Blocher crei betg tgi tar las elecziuns naziunalas digls 18 d'otgover 2015 vignigl tar ena sglischeida alla dretga. «A nous vogl anc mengia bagn ed anc è la veia dolorosa mengia lontanta», ò accentuo la candidata pigl cunsegl naziunal. Vess ella da neir eligeida resta betg oter tgi da delegar aint igl travagl a Domat ed averir confidanza ainten igls bungs e fidevels ampluias. Sen la direenziun dalla «EMS Chemia», less la patrunga Magadlena Martullo-Blocher an nign cass renunztgier.